

Cantidad di ATV/UTV ta keda ricibi critica na Aruba

Recientemente, un potret di un grupo di turista haciendo tour di ATV/UTV na Aruba a hala atencion di otro turista, cu a lamenta e situacion cu e vehiculonan aki na Aruba. Ciudadanonan local tambe a tuma nota di esaki y a expresa nan disgusto.

Den un post riba e grupo di Facebook "I Love Aruba", un usuario a comparti dos potret den cual por mira turistanan ta den un rij, riba ATV/UTV. Hunto cu e potret, el a comparti e mensahe "fierno. Pober Aruba." E post a ricibi 368 reaccion y 234 comentario.

E post aki tambe a keda comparti den e grupo "Stop UTV tours Aruba", hunto cu e mensahe: "Nos bishitantenan ta 'stimando' tur e UTV tour bishitando Tres Trapi." Riba e post aki, diferente persona a comenta criticando e practica di ATV y alabes cuestionando e maneho di autoridadnan cu no ta tuma accion contra esaki, mientras cu ciudadanonan cu ta biba den

e area unda e tour cu e vehiculonan aki ta pasa ta keda expresa nan malcontento cu e situacion.

Finalmente, ambientalista local, Nigel Maduro a comparti e post di "Stop UTV tours Aruba", cu e mensahe: "Mi ta nenga di acepta esaki como e norma nobo di nos isla." Varios usuario di Aruba a responde na Maduro, comentando entre otro cu "no tin pas riba e ruta ey." "Stroba localnan pa pasa dia lama no tin lugar pa para auto" otro a comenda. "Y e kayaknan tambe ta stroba localnan haya lugar pa sinta na Mangel Halto y Santo Largo. Cua lama localnan tin cu bay anto?"

E discusion riba vehiculonan ATV y UTV ta persisti pa años na Aruba. Ambientalistanan ta bati alarma tocante e daño cu e vehiculonan aki ta causa na naturalesa. Entre otro door di directamente trapa riba animal y mata, pero tambe door di perturba e suelo natural causando entre otro, erosion.

Den su articulo april ultimo, titula "Aruba's Visitors Are Loving The Island To Death," Forbes a nota cu "riba un dia normal, centenares di vehiculo ta core riba e camindanan di santo cerca di beach y lantando stof. Ambientalistanan ta luchando pa protege e simbolo nacional stima di Aruba, e Shoco chikito, y Terns, di haya nan neishi destrui pa ATVs." E articulo ta cita experto di parha, Michiel Oversteegen, bisando cu "cada aña nan ta core riba e sitionan di neishi y mata centenares di parha recién naci."

Ademas di e daño directo na naturalesa, e vehiculonan aki tambe ta causa molester pa local y turista. Entre otro, a keha di e zonido y stof, pero tambe di e manera con e vehiculonan aki ta core irresponsablemente riba caminda. Tambe tin cantidad di accidente cu e vehiculonan aki, por ehemplo juni ultimo, unda dos turista a accidenta (riba potret).

September ultimo, minister



di Transporte y Naturalesa e tempo ey, Ursell Arends (Raiz) a bisa cu ta bin un fase transitorio pa maneho di ATV/UTV pa e proximo 3 aña, cuminsando 1 di januari 2025 y lo termina na 2028, den cual e vision ta cu den 2028 tur compania a cambia nan actividad pa uno cu ta den harmonia cu naturalesa.

Segun el a bisa, entrante 1 di januari 2025, lo apunta tres ruta alternativo, regula desorden y velocidad, y alabes crea espacio di regeneracion

di areanan di naturalesa afecta (natuurgebieden y natuur en landschap). Pa 2026 lo pone fondonan disponibel pa "micro transition loans", unda companianan chikito por aplica pa yuda cu e transicion pa un otro negoshi. Pa sigui incentiva e transicion di e sector lo traha cu programanan di certificacion den cual ta reconoce companianan cu a demostra boluntad y curashi pa cuida nos naturalesa y alabes stimula actividadnan diferente.

A haya curpa sin bida di un hende homber riba rif

Diaranson pa mas o menos 10:15 di mainta, central ta wordo notifica via di Polis Maritimo cu lo tin un curpa sin bida riba e rif dilanti waf Oranjestad.

E prome informa ta indica un yate lo a pasa y a wak un curpa riba e rif. E personal di e yate a tuma contacto cu Polis y di biaha polis maritimo a mobilisa na e sitio di e sucedido na unda en berdad a topa cu un curpa sin bida di un homber, segun polis a informa mediante un comunicado di prensa.



A avisa dokter forensico, Polis forensico, slachtofferhulp y Altocomisario di polis sr.Arnheim tambe tabata pre-

sente. Na prome instante no por a identifica e curpa sin bida. Despues di investigacion a



bin resulta cu ta trata di e homber N.T. di nacionalidad Mericano di 62 aña. E tabata nabega cu su boto di bela.

Departamento di slachtofferhulp a tuma contacto cu consulado como tambe famia di

e defunto.

Cuerpo policial y Bon Dia Aruba ta manda palabra di profundo condolencia na famia di e fayecido.

Misha Raymond y Carlos Guiamo ta retira di plataforma Raiz

A traves di un carta publica riba nan website y rednan social, plataforma Raiz a anuncia e retiro di dos miembro di nan plataforma, riba dia di hura-mentacion di Parlamento nobo, den cual Raiz no tin representacion.

"Un danki specialmente ta bay na cada un di e 2,323 votadornan cu a wak nan mes refleha den e vision di RAIZ, un plataforma profesional cu a demostra cu gobernacion y politica na Aruba por wordo conduci exitosamente na un

manera limpi, honesto y sin efecto negativo pa e tranquilidad ni privacidad di nos ciudadanonan," a bisa den e carta.

Den su comunicado, e partido a bisa cu "Awor cu temporada di campaña y dianan di fiesta a pasa plataforma RAIZ lo duna tur espacio y cooperacion pa e proceso di formacion di gobierno nobo por cana na un forma organisa y conforme local ley ta prescribi. RAIZ ta preparando tambe pa e traspaso di cartera por bay na un forma debido y

elegante, como debe ser."

Ademas, a indica cu e plataforma a cuminsa un proceso di reforma y ta reorganizando pa proximo eleccion, y ta como parti di e proceso aki cu ta anuncia cu Raymicheline "Misha" Raymond y Carlos Guiamo, kende tabata candidato riba lista di Raiz pa ultimo eleccion, no ta forma parti di e plataforma mas. "Nos ta gradici ambos pa nan colaboracion y dedicacion durante nan tenura cu RAIZ y ta desea nan tur clase di exito."



Finalizando, Plataforma Raiz a felicita tur partido cu a haya asiento y e parlamentarionan cu a huramenta, "special-

mente e parlamentarionan cu pa prome biaha lo funciona den e organo di mas halto na nos pais."